

Berikut adalah puisi berjudul, 'Negaraku Terbilang' yang dideklamasikan Perdana Menteri, Datuk Seri Abdullah Ahmad Badawi di Pesta Puisi Patriotik Ke-5 anjuran Biro Tatanegara, Jabatan Perdana Menteri (JPM) dengan kerjasama Kelab Warisan Malaysia (Keris) di Dataran Wawasan, Putrajaya, malam tadi.

Negaraku Terbilang

Takala aku menggagahi diri membelah kota raya
aku mendongak melihat tiang-tiang seri mencecah awan
rasa bangga bangsa menyala-nyala di dada
jauh sudah rupanya negaraku mengembara

Fikiran teringat zaman remajaku
zaman tiada gerbang, tiada simbol pencakar langit
Yang ada hanya siul burung-burung di bendang
tapi di sana kaya kemanusiaan
kaya keampunan dan kasih sayang
kaya tangan menghulur bantuan

di tangan ribuan wira tak didendang

Di luar sempadan ada cabaran
dunia semakin deras dan bergelora
tidak terperangkap kita dengan kata-kata
yang cepat mendapat habuan luar biasa
yang lambat mendapat sisa-sisa

Kita memilih sederhana daripada yang mutlak
pelbagai daripada yang menyendiri
percaya daripada mencurigai
bersama daripada menguasai
ke hadapan dengan acuan kita sendiri

yang diwarisi tidak berkurang
yang dijaga tidak susut

Di sini di bumi ini
Kita serikan pencakar langit dengan kesyukuran wajah
kemanusiaan
kita anyamkan cita-cita, Alfred Nobel dengan mesej
Muhammad Iqbal
kita bajai kembang kemboja keamanan di atas kubur rakus
perang
kita tiupkan serunai budaya cinta merentas sempadan
kita pacak panji-panji di puncak kemegahan negara
yang cemerlang, gemilang dan terbilang

Berikut adalah puisi berjudul 'Tanah Jantung' yang dideklamasikan isteri Perdana Menteri, Datin Seri Endon Mahmood di majlis sama, malam tadi.

Tanah Jantung

Ini negeri kita
Negeri kasih
Kasih kita pada yang tak berbelah
Kasih kita dalam rangkul genggam
sejarah

Kita genggam sejarah
Sejarah moyang diusap bahagia dan
gundah
Gundah beradab akhirnya terlerai
Telah kita redahi pahit getir di lembah dan
ngarai

Pengalaman menjadikan kita lebih dewasa
Jatuh dan bangun anak-anak bangsa
Kenal makna fahami erti sebagai warga
Kita menjadi warga berani, percaya diri,
dan
perkasa!

Ini ibu pertiwi kita
Negeri cinta
Cinta kita yang setia terukir
Berdenyut di nadi bersama merah darah
mengalir.

Alirnya memercikkan cita
Cita kita memercukan jaya
Jaya ini kelak menjulangkan maruah
Maruah tinggi di tanah merdeka yang
indah.

Selamallah kau tanah jantungku yang
indah
Dari utara ke selatan, timur dan ke barat
jua
Petamu kejaplah sudah
Udaramu damailah akhirnya
Melindungi memayungi
Bumi kekasih ini.

Ini negeri kita
Diukir ikrar dan kata
Dikibar jalur gemilang merata
Senandung dan nyanyi bernafas setia.

Kesetiaan kita hanyalah kesetiaan untuk
tanah jantung
Dari perut laut hingga ke puncak gunung
Awan-gemawan tanah air gemilang
Kurenjis mawar kasih ke sekian kalinya
untuk kau negeri yang kukasih!

PM, isteri meriahkan puisi patriotik

PUTRAJAYA: Datuk Seri Abdullah Ahmad Badawi dan isteri, Datin Seri Endon Mahmood menghidupkan Pesta Puisi Patriotik Ke-5 di sini, malam tadi dengan masing-masing mendeklamasikan puisi penuh semangat.

Perdana Menteri dengan penuh penghayatan menyampaikan puisi karyanya berjudul, *Negaraku Terbilang*, manakala Endon tampil dengan puisi, *Tanah Jantung* di hadapan lebih 500 penonton pesta tahunan itu.

Dalam puisinya, Abdullah merenung kehidupan dengan mengimbu kenangan masa remaja yang dilihatnya kaya dengan nilai kemanusiaan, selain mengajak khalayak memikirkan hakikat kehidupan yang penuh cabaran sekarang.

Perdana Menteri, juga menyelitkan harapan supaya negara mencapai kemajuan mengikut nilai serta acuan sendiri, tanpa menggadaikan apa yang diwarisi demi mencapai Malaysia 'cemerlang, gemilang dan terbilang'.

Selain Abdullah dan Endon, ahli akademik, tokoh korporat, birokrat dan penyajak tempatan berkongsi ruang mendeklamasikan puisi masing-masing pada majlis di Dataran Wawasan, berhadapan Kementerian Kewangan (MOF), di sini.

Antara mereka yang mendeklamasikan puisi ialah Ketua Eksekutif Kumpulan Permodalan Nasional Berhad (PNB), Tan Sri Hamad Kama Piah Che Othman; Ketua Eksekutif



PERDANA MENTERI bersemangat ketika mendeklamasi sajak, malam tadi.

Tenaga Nasional Berhad (TNB), Datuk Che Khalib Mohamad Noh; tokoh akademik dan penganalisis politik, Datuk Dr Firdaus Abdullah; seniman Datuk Jins Samsudin dan barisan penyajak terkemuka tanah air seperti Datuk Dr Ahmad Kamal Abdullah (Kemala) dan Datuk A Samad Said.

Bekas pengacara televisyen, Ras Adiba Radzi turut mendendangkan dua lagu, *Fatwa Pujangga* dan *Semalam di Malaya*.

Malam Puisi Patriotik Ke-5 yang dianjurkan oleh Biro Tatanegara,

Jabatan Perdana Menteri (JPM) sempena ulang tahun kemerdekaan negara ke-47, bertujuan menyemarakkan semangat patriotisme serta kecintaan kepada bumi Malaysia.

Selain bacaan puisi, Malam Puisi Patriotik Ke-5 turut diserikan dengan persembahan koir Biro Tatanegara, JPM yang pertama kali mendendangkan lagu dari sajak karya Perdana Menteri, *Kucari Damai Abadi*.

Badan Budaya TNB turut mengadakan persembahan kebudayaan.



ENDON tidak ketinggalan mendeklamasi sajak berjudul Tanah Jantung.